

COMUN: Dai 20 de setëMBER ai 15 d'otober vëgnel indô metü sö ti trèi paisc da San Martin, Lungiarü y Antermèia les **bènes da sciurè ite i ciüf**; al vëgn racomane da ne sciurè ite nia d'ater co ciüf (nia lades, fassli, bossi, peres y d'ater).

Al vëgn lascè al savèi che le Comun é por tó sö **nr. 1 assistènt/a amministratif** dla 6ª qualifica funziunala a tēmp plēgn cun contrat a tēmp determiné por l'ofize de contabilitè. La domanda de assunziun mēss gní dada jö cina la jöbia ai 30.09.21 dales 12.00. Info www.comun.sanmartinetor.bz.it o tl ofize personal dl Comun.

Al vëgn metü a jí n curs por adoré le defibriladú. Les porsones interessades é periades da telefoné te comun a David 0474 524377 cina ai 30 de setëMBER

SANITÉ: Le dotur Aldo Marcocci vá en ponsiun con le pröm d'otober. Por fá lède l'ambulatory él stlüt dai 27 ai 30 de setëMBER. En chisc dis gnarál sostitú da dr. Grete Mahlknecht (0474 523 018 – 349 06 67 034) te so ambulatory a San Martin

PLOANIES SAN MARTIN Y LUNGIARÜ

Incö domènia, ai 19 de setëMBER, dales 14.30 él a La Val na Mēssa en recort dl **sorvidú de Dî siur Heinrich Videsott** y vijita te cortina.

La **Uniun di Èi Val Badia** invièia dúc i èi y i jogn en vëndres, ai 24 de setëMBER, dales 19.30 tla dljia de Badia a tó pert ala prozesciun cun linternes o ciandères da San Linert sö Oies. Tolésse do na linterna o na ciandèra.

La **Uniun Generela di Ladins dles Dolomites** invièia al Peregrinaje sö Oies en sabeda, ai 25 de setëMBER: 14.30 incuntada tla dljia de San Linert, 15.00 tru dles Staziuns, 16.00 Mēssa cun siur degan Iaco Willeit y le Cor da La Pli de Fodom.

PLOANIA SAN MARTIN

I **resultac dla prelita dl Consèi de Cöra** é tacá fora dan dljia. Dötes y dúc chi che á ciagé usc y ince dúc i atri interessá dess se fá pinsiers sc'ai é a òna da sté sön lista por les lites ai 24 d'otober. Toledè sö contat cun valgügn dl consèi de cöra.

En la **Segra da San Martin**, ai 26 de setëMBER, píta la Uniun dla Musiga da San Martin dales 10.30 ales 20.00 sön plaza dl paiun spèises da tó do: galúc, pommes frites y cajincí arestis. Prèibel apostede denant: la marèna cina les 09.30 y la cèna cina les 16.30 por telefon o scriede n sms 345 59 20 048.

Dilan dl'oferta por la capela da Ju en memoria de Amalia Zingerle Clement da pert de Irene, Eduard y Carla Zingerle.

PLOANIA LUNGIARÜ

La **Uniun di Èi da Lungiarü** invièia dúc en domènia ai 26 de setëMBER al trú dles Staziuns. I piun ia dales 14.00 dala dljia demez.

La **Uniun dles Ères** invièia ite dala Ütia Ciampcios l'atra jöbia, ai 30/09 por les 10.00 a n bun danmisdé. I s'incuntun dales 08.30 tla plaza Pares por jí ite adóm. Prenotesse cina en lönesc ai 27/09 pro Chantal 348 17 33 391. Cost 15 € porom.

La **Uniun dles Ères** invièia bel al "Workshop por plü sostenibilitè te ciasa" cun Giulia Moling en jöbia ai 23/09 dales 19.30 tl salf dl paisc a Lungiarü. Le cost é de 15 € porom. Tó pert ma cun greenpass. Prenotesse pro Chantal 348 17 33 391.

Edema dl Alpinist dai 19 ai 26 de setëMBER: escursciuns acompagnades y n documentar sura l'arpizada dl Everest de Davide Chiesa. Le program é da ciagé tla Cooperativa turistica. Les iscriziuns por les escursciuns vëgn tutes sö cina le dé denant, tla Cooperativa turistica Al Plan – San Martin 0474 501 037.



www.valbadiaonline.it/comunitè

Plata dles Ploanies San Martin y Lungiarü

ploan Klaus Sottas 344 15 54 055 - klsottas@rolmail.net
siur curat Heinrich Perathoner 339 65 74 213
redaziun: anton.gasser@rolmail.net - 348 27 44 517 / 0474 523 194

19.09. - 26.09.21 nr. 43
ultimo termo por comunicaziuns: jöbia, dales 20.00



25ª DOMÈNIA IA POR L'ANN B

Vangele do Merch 9,30-37

Ai ê rová a Cafarnaum.

Canch'al ê spo te cíasa, i àl damanè: Porsura cî èise pa baié sön tru?

Ai scutâ, deach'ai â baié deboriada sön tru cal che ê le plü gran de d'èi.

Dailò s'â Gejù sentè, à cherdè i dodesc y ti à dit:

Chèl che ô ester le pröm dess ester l'ultimo de dúc y le sorvidù de dúc.

Y al à metü n môt amesa èi,

spo l'âl tut te sù brac

y ti à dit a d'èi:

Chèl che tol sö n te' môt

por mia gauja, tol sö mè;

chèl indere che tol sö mè,

ne tol nia sö mè,

mo chèl che m'â menè.



Che ne se recorda pa nia, sc'an n'è da mituns nia gnüs invia a val' incuntada o pro val' gara o val' jüch sc'an é rová ultimi. Le desplajèi y les legremes! Al n'è nia bel, da ne cunté nia y da ne valèi nia.

Y ince da gragn ne stunse nia ion iadedò sc'al é ma i pröms che abina val'. Gejù nes fej coraje da sté datrai ince iadedò.

Ince Gejù é jü por n tru olach'al ne ti aspetâ nia de bun, y sön chèsc tru ti däl ai discepui n ejèmpl, tolon n môt te sù brac.

Sc'i se dun da fá por chi che ne cunta nia y por i trascurá impede se mète tla pröma ligna, sc'i ciarun plü de "nos" co de "me", spo se davagnunse n post dlungia Gejù.

I ne sun nia susc sc'i jun y stun danter i ultimi.

Forsc se mudass le monn. (Image)

EDEMA	SAN MARTIN	LUNGIARÛ	LE TRU NÛ DLA CREJIMA:
19.09.21 25ª DOMËNIA - ann B	9.00 Corona 9.30 Gran Mëssa por la comunité cun benedisciu dl tëmp por families de Teresa Pedevilla Flöss + Giovanni Flöss ++ Siegfried y Maria Zingerle, Col + Clara Flöss Alfreider	7.55 Corona 8.15 Gran Mëssa por la comunité cun benedisciu dl tëmp 11.30 Bato de Alan Sorà 15.00 Corona tla capela de S. Ojöp Fr.	LE TRU NÛ DLA CREJIMA: Co vára pa inant cun la Crejima? Por ciafé respostes vëgnel tigní döes sères d'informaziun cun le direttur tl ciamp dla catechesa dla Diozeja Markus Felderer por düc y dötes tla preparaziun ala Crejima tla Val Badia: jonëza, geniturs, families, tot/ totes, catechisc'... en lönesc, ai 20 de setëmber, dales 20.00, a La Val te dljia (y tl salf dles uniuns) - plü por la Val Badia alta y en jöbia, ai 23 de setëmber, dales 20.00, ince a La Val te dljia (y tl salf) - plü por la Val Badia bassa. - Düc é bel inviá da gní!
20.09.21 Lönesc <i>André Taegon y Paul Hasang</i>			
21.09.21 Dedolönesc <i>Matí apostul y vangelist</i>	19.00 Mëssa + Sepl Flöss, d'Arzó + Paul Erlacher (Germania) + por les püres Animes		
22.09.21 Dedemesaledema <i>Maurizius, Tomesc, Jonas</i>		7.30 Mëssa ++ de Sepl y Maria Clara. Sanví ++ Pire a Angela Dapoz	
23.09.21 Jöbia <i>Pio da Pietralcina, Tecla</i>	7.30 Mëssa ++ Pina y Sergio (Roma) + Edi Pizzinini, Al Plan + Maria Alfreider Zingerle Corona por Vocaziuns		
24.09.21 Vëndres <i>Rupert y Virgile</i>	18.30 Adoraziun chîta 19.00 Adoraziun deboriada	7.30 Mëssa por fam. Albert Dapoz por les Animes dl purgatore	
25.09.21 Sabeda <i>Niclaus da Flüe, Aurelia</i>	20.00 Mëssa prefestia + Otto Zingerle (dl ann) + Clara Frenner Zingerle + Artur Conrater ++ Pire y Heinrich Erlacher	18.30 Mëssa prefestia por i benefaturs dla capela de S. Ojöp Fr. por la fam. de Clemente y Cherubina	
26.09.21 26ª DOMËNIA - ann B	Festa dla Segra dla dljia da San Martin 9.00 Corona 9.30 Gran Mëssa por la comunité cun benedisciu dl tëmp de reng. fam. Paul y Maria Sorà + suor Angelina Sutto ++ Pedevilla, Ju	7.55 Corona 8.15 Gran Mëssa por la comunité cun benedisciu dl tëmp 14.00 Tru dles Staziuns cun la Uniun di Èi	

EDEMA DLA FEDE ai 17 - 24 d'otober

Al'Edema dla Fede 2021 unse ince invié siur Eugen Runggaldier, vicar general dla diozeja, a na incuntada, en vëndres, ai 22 d'otober, da sëra, a La Val.

Por ti dé a tröpa jënt la poscibilité da tó pert y ciafé respostes a ci che se stá a cör dla fede y dl dagní dla Dljia, él gnü ponsé da cöie adöm les domandes che nosta jënt se fej.

Porchël ves periunse da scrí valgönes de chëstes ostes domandes y les dé jö te dljia tla cassëta aposta cina la domënia sëra, ai 10 d'otober.

I responsabli dl' "Unité pastorala" les ortiará inant a siur Eugen. Pro la incuntada en che sëra aldiarunse spo les respostes.